

Centro Famia di Criansa Arubano

Famia di Criansa, un reto, dedicacion y satisfacci3n

Nos ta un famia di criansa. Kico esey ta nifica pa nos?

E ta un decision cu a bin cuhopiresponsabilidad. Ta importante pa ta prepara mentalmente pa tuma un decision asina, ya cu no ta tur dia ta mesun facil.

E ta un bunita tarea, pero cu tin hopi reto.

Na cuminsamento e ta un cuestion di adaptacion di ambos banda, pues abo tin cu adapta na e mucha, pero e tambe tin cu adapta na e famia.

Aki ta importante pa tene cuenta cu cambio no tur ora ta bai facil y na cuminsamento no por falta compresion pa e situacion.

Ta hopi importante pa abo cu bo pareha ta riba e mesun liña ora cu ta trata duna guia, atencion y coregi un yiu di criansa.

Asina e mucha ta haya

estructura, confiansa den su mes, pero tambe confiansa den e mayornan di criansa.

E cuido di un yiu di criansa ta encera hopi trabou, dedicacion, pasenshi, comprension y perseverancia, pero na final di dia bo satisfaccion por ta hopi grandi.

Sigur ora cu bo wak e mucha ta progresa tanto den su desaroyo personal, como den su relacion cu bo como mayor di criansa.

E ta un cuestion di hopi atencion, amor, cariño, alegria y felicidad.

No solamente loke cu abo ta duna e mucha, pero sigur tambe loke cu bo ta haya bek di bo yiu di criansa.

Cada mirada, sonrisa, sunchi of brasa por bisa mas cu mil palabra y por yena bo cu hopi orguyo.

Un yiu di criansa ta trece cambio den bo bida, paso bo tin un persona mas pa tene cuenta cu ne ora cu ta trata di tuma cierto desicionnan.

Por ehempel si bo tin un yiu di criansa chikito bo no por lanta y sali ki ora cu bo ta desea, bo tin cu pensa riba su ora di drumi of riba opvang.

Comunicacion entre abo y bo pareha ta bira hopi mas importante, pa por yuda e yiu di criansa den su desaroyo.

Cada bes lo bo topa cu otro reto riba tereno di comportacion of buscamiento di atencion di parti di e yiu di criansa.

Bo ta siña improvisa, paso loke a funciona ayera kisas no ta funciona awe.

Pero keda pensa y actua positivo, trata na duna e mucha e siguransa cu bo t'ey p'e, pues cu bo kier lo mihor p'e y cu bo ta stim'e apesar di tur cos.

Semper trata di duna hopi 'pluimpje' y lo bo ripara con su wowo por briya y poco poco su stimacion propio tambe lo crece.

Depende di e situacion, un relacion positivo y un bon comunicacion cu e mama biologico tambe por ta importante.

Pa e yiu di criansa, pa evita confusion di e situacion cu e mucha ta aden y pa e mucha por sinti su mes un poco mas trankil.

Y pa e mama pa e sinti cu su yiu ta den bon man. Te awo nos tin un experiencia hopi positivo riba e tereno aki.

Ta un famia di criansa ta un decision cu te awe nos no ta arepentí di a tuma. Bo satisfaccion ta cu bo a yuda un mucha den un temporada dificil di su bida.

Bo ta haci bo maximo esfuerzo pa dun'e hopi recuerdo bunita cu e por atene su mes na dje.

Un yiu di criansa ta un mucha hopi special. Abo como famia di criansa ta dun'e un man pa e por logra un mihor mañan!